

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : BUKAN LISAN

**DARIPADA : YB TUAN NIK NAZMI BIN NIK AHMAD
[SETIAWANGSA]**

SOALAN

TUAN NIK NAZMI BIN NIK AHMAD [SETIAWANGSA] minta **PERDANA MENTERI** menyatakan status kemajuan proses pendaftaran automatik pengundi dan penurunan had mengundi ke 18 tahun ke atas yang telah diluluskan menerusi pindaan Perlembagaan pada tahun 2019.

JAWAPAN: [YB DATO' TAKIYUDDIN BIN HASSAN, MENTERI DI JABATAN PERDANA MENTERI (PARLIMEN DAN UNDANG-UNDANG)]

Tuan Yang di-Pertua,

Untuk Ahli makluman Yang Berhormat, Suruhanjaya Pilihan Raya (SPR) sedang dalam persiapan untuk melaksanakan umur kelayakan pengundi 18 tahun dan pendaftaran pemilih secara automatik berdasarkan kepada pindaan Perkara 119(4) Perlembagaan Persekutuan yang telah diluluskan oleh Parlimen pada Mesyuarat Kedua Penggal Kedua Parlimen Keempat Belas. Persiapan yang sedang dilaksanakan oleh SPR adalah meliputi penyediaan **pindaan kepada Peraturan-Peraturan Pilihan Raya (Pendaftaran Pemilih) 2002 dan undang-undang lain yang berkaitan, penyediaan *standard operating procedures* (SOP) dan penyediaan sistem dan infrastruktur** bagi pelaksanaan umur kelayakan pengundi 18 tahun dan pendaftaran pemilih secara automatik.

Bagi maksud membantu SPR dalam menyediakan SOP pelaksanaan pendaftaran pemilih secara automatik ini, SPR telah mengadakan **beberapa sesi libat urus** bersama beberapa jabatan/agensi Kerajaan seperti Unit Pemodenan Tadbiran dan Perancangan Pengurusan Malaysia (MAMPU),

Jabatan Perdana Menteri; Kementerian Dalam Negeri; Jabatan Pendaftaran Negara (JPN); Jabatan Penjara Malaysia; Pejabat Ketua Pendaftar Mahkamah; Kementerian Kesihatan Malaysia; Angkatan Tentera Malaysia; dan Polis DiRaja Malaysia.

SPR juga telah mengadakan beberapa sesi libat urus seperti berikut:

- (i) Sesi Libat Urus Bersama Parti-Parti Politik Dari Blok Kerajaan Dan Blok Pembangkang (Bipartisan) Berhubung Pelaksanaan Umur Pengundi dan Calon 18 Tahun serta Pendaftaran Pemilih Secara Automatik pada 3 Oktober 2019;
- (ii) Sesi Libat Urus Dengan Pertubuhan-Pertubuhan Bukan Kerajaan dan Parti-Parti Politik Negeri Sarawak pada 26 November 2019; dan
- (iii) Sesi Libat Urus Dengan Pertubuhan-Pertubuhan Bukan Kerajaan dan Parti-Parti Politik Negeri Sabah pada 3 Disember 2019.

Melalui penganjuran sesi-sesi libat urus tersebut, SPR telah memberi penerangan mengenai perancangan pelaksanaan pindaan undang-undang yang telah diluluskan serta mendapatkan maklum balas dan pandangan daripada semua pihak.

Di samping itu, SPR juga sedang bekerjasama dengan JPN melalui **Jawatankuasa Taskforce SPR dan JPN** dalam persiapan melaksanakan pendaftaran pemilih secara automatik dan urusan-urusan lain yang berkaitan. SPR menjangkakan semua persiapan yang sedang diambil tindakan oleh SPR akan dapat disiapkan dalam tempoh **18 hingga 24 bulan dari tarikh kelulusan pindaan oleh Dewan Negara pada 25 Julai 2019**. Sehubungan itu, jangkaan tarikh pelaksanaan tersebut adalah selewat-lewatnya pada bulan **Julai 2021**.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : BERTULIS

DARIPADA : TUAN NOOR AMIN BIN AHMAD [KANGAR]

SOALAN

TUAN NOOR AMIN BIN AHMAD [KANGAR] minta **MENTERI KEWANGAN** menyatakan berapa jumlah hutang negara dan nisbahnya dalam peratus berbanding KDNK berikutan pengumuman pakej rangsangan dan kekurangan kutipan hasil kerana kegiatan ekonomi tidak bergerak seaktif di luar waktu pandemic COVID-19.

JAWAPAN

Tuan Yang di-Pertua,

1. Berdasarkan pengiraan had statutori, nisbah hutang Kerajaan Persekutuan yang merangkumi instrumen Sekuriti Kerajaan Malaysia (MGS), Terbitan Pelaburan Kerajaan Malaysia (MGII) dan Bil Perbendaharaan Islam Malaysia (MITB) mencatat 56.6% daripada KDNK, masih di bawah had statutori 60% yang ditetapkan.
2. Secara umumnya, Kerajaan bertanggungjawab untuk memastikan pembiayaan semula hutang Kerajaan Persekutuan dilaksanakan secara teratur mengikut jadual. Dalam situasi krisis pandemik COVID-19 yang masih berlarutan ini, Kerajaan akan memberi tumpuan terhadap pemulihan ekonomi terutamanya menyokong aktiviti perniagaan dan memelihara kesejahteraan rakyat. Setelah ekonomi kembali pulih, Kerajaan akan kembali melaksanakan langkah konsolidasi fiskal dan inisiatif pengukuhan kedudukan fiskal kerajaan dalam usaha memastikan paras pendedahan hutang dan liabiliti kewangan Kerajaan Persekutuan kekal terkawal dan terurus. Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS TAHUN 2020**

PERTANYAAN : BERTULIS

**DARIPADA : YB TUAN NOOR AMIN BIN AHMAD
[KANGAR]**

SOALAN

TUAN NOOR AMIN BIN AHMAD [KANGAR] minta **MENTERI SUMBER MANUSIA** menyatakan jumlah pekerja yang kehilangan pekerjaan dari suku kedua (awal April) 2020 sehingga akhir suku ketiga (akhir September) 2020. Berapa ramaikah di kalangan mereka yang layak dan telah diberi pampasan yang wajar.

JAWAPAN

Tuan Yang di-Pertua,

1. Berdasarkan statistik Sistem Insurans Pekerjaan (SIP) jumlah pekerja yang telah kehilangan pekerjaan dari suku kedua (awal April) 2020 sehingga akhir suku ketiga (akhir September) 2020 ialah seramai **68,115** orang. Statistik terkumpul sehingga 20 November 2020 adalah seramai **97,821** orang telah kehilangan pekerjaan. Bagi tempoh sukuan kedua (awal April) hingga ketiga (akhir September), seramai **54,496** orang yang telah kehilangan pekerjaan yang layak telah menerima faedah daripada SIP. Manakala bermula Januari 2020 sehingga 20 November 2020, seramai **77,422** orang yang telah kehilangan pekerjaan yang layak telah menerima faedah daripada SIP melibatkan bayaran keseluruhan adalah sebanyak **RM297.16 juta**.

Sekian, terima kasih.